

18.2.2009

Betreff: Bewegende Schwänze und Momente

Sali zaemme

Do sinn mr also gestert Morge – für mini Verhältnis gaaaanz frieh – am halber siebener uf e Bus richtig Phuket gefahre. Haenn nach fast 6 Stunde Fahrt in unserem Guesthouse imenä Künstlerviertel in Phuekt Town icheggt und uns mit em öffentliche Bus – wo denn ändlig au emolle e Chauffeur uftaucht isch – zum DiveSupply ufgmacht. Dört hän mr flissig Lampe gshoppt, damit mr nid immer im Dunkle mien tauche ☺ und denn kurzerhand entschiebe, as uns das Phuket chli z heiss und z hektisch isch, und mir dorum unseri Ferie um ei Tag kürze. Ursprünglich hänn mir jo bis am Donnstig welle bliebe, do mir aber jetzt scho am Mittwuch wieder heime hänn wellä, ichs grad e chli stressig worde, do mir jo no zwei grossi Shopping Center hänn welle heimsueche. Das hänn mr au mehr oder weniger erfolgriech gmacht. Weniger, wills uns nid soooo beidruckt het und mehr wills im einte e ganz e feini Delikatesse Abteilig kha het und mir uns e kleine Sönäck gönnt hänn: Emmethaler Käs, e feins Ciabatta, Olive, Salami und trögneti im Oliveöl ieglegti Tomate. Das Ganze het schlappi CHF 20.- kostet!! Wer asiatische Verhältnis kennt, weiss, dass das e kleins Vermöge isch. Aber mir hänn uns eso öpis vo schmegge loh, das könne dir euch gar nid vorstelle. Mehr als kaputt sinn mr denn no öpis go ässe, hänn no eine gno, das goht jo schliesslig immer no und sinn den tod mied in unserem blaue Zimmer (Föteli aluege) iegschloofe.

Hüt a Morge, gweckt vo dr Moschee und ihrem Vorsänger (ganz zur Freud vom Mischa), hänn mr e chli kaffelet, s het drum in unserem Quartier ganz viele kleini Kaffis kha, wo numme so speziell und cool sinn, wills sie scho fast ussenander gheie. Am 12i ischs denn au scho wieder ab in Richtig deheime gange und am halb sächsi sinn mr glandet.

Fazit: Phuket isch – zumindest in unserem Quartier – weniger touristisch als mirs erwartet hänn, het, wenn me sich Zyt nimmt, ganz viel kurligi Egge z biete, isch aber schlussändig für uns z hektisch, z heiss und d Lüt sinn chli abglöschet → bim Kaffi hüt am Morge hänn mr – ups – e Tasse kaputt gmacht. D Dame hinter dr Theke (wo scho bi minere Bstellig fascht iegschloofe isch) het denn vor em Putze grad em Chef aglüte um z raportiere und isch mit stränger Miene cho brichte, as sie uns für das 100 Baht berächne wird! I mein 3 Stutz, isch doch grad e chli viel, vor allem hani uf das abe kei zweite Kaffi me gno und mir wärde sicher au nümme dört ane goh....

Das sinn emolle die bewegende Momänt in Phuket gsi...miend aber nid meine i sig scho fertig, hüt mien dr chli länger durehalte ☺

Wo mir vor unserem schnugglige Hüsi in Ranong stönn, mien mir doch mit Schregge feststelle, as mir d Katz iegsperrt hänn – doppelups! Wer Katze het, kha sich danke was jetzt kunnt: näurlig hänn mir sofort s ganze Hus uf Spure durchsuecht, erstunligerwies aber keini gfunde. Au nid unterm Bett....ok, chli

spöter denn scho: uff em KOPFKÜSSI vom Mischa isch e mega Huffe gläge und mis (äxtra vo dr CH mitgnoh) isch völlig durchnässt gsi. Dr Mischa goht jetzt drum grad 2 neuu go boschte.

Mir hänn denn d Katz natürlig sofort afoh fietere, was sie aber nid drfoh abghalte het kurz druf abe e Eidechse-Blindschlieche Mischig z jage und die drzue z bringe, as sie dr Schwanz abwirft. Dä het sich natürlig fröhlig wieter bewegt und d Katz het nimm so rächt gwüsst was jetzt grad passiert. Beides – also dr Körper und dr Schwanz - hani, nachdäm ichs e chli gnauer agluegt ha (natürlig gits au vo däm Föteli) vorhärt usegwünscht.

Mängi finde das jetzt vielleicht brutal oder sogar pervers, das isch aber halt eifach unsere Alltag, sorry. Ihr gönd ins Kino, mir dien uns so wieterbilde ☺

Soviel zum Thema bewegendi Schwänz!

Uf jedefall sinns 2 bewegendi Täg gsi, mir hänn Spass kha, sinn aber au sehr froh, wieder im rühige Ranong z si.

Was unseri Rägezyt Plän agoht, hänn mr no keini definitive News. Vomenä Tauchcenter in Miri uf Borneo hänn mr e Absag, aber dr Mischa het uf Facebook e Typ vo Miri gfunde und en agschriebe. Jetzt sinn sie chli am Schriebe und dä Typ het uns jetzt e Telifonnummerä gäh vo eim, wo Hüser vermietet. Wer weiss, villicht gönn mr eifach chli go läbe dort und dien Borneo erkunde...mir wärdes euch verzelle.

Ganz liebi Griessli  
Carmen und Mischa